

- *1. وزیر اعظم نریندر مو دی غو کہنو ہے جے مصنو عی ذبانت خواتین واسطے بہت اہم تے فائدہ مند ہے تے اس غی مدد سنگ نواں موقعاً پیدا کیا جا سکیں۔
- *2. مرکزی وزیر داخلہ گووند موہن نے یوٹی غی سلامتی صورتحال غو جائزو لین غی خاطر جموں مانہ اک اعلیٰ سطحی میٹنگ غی صدارت کی۔
- *3. پارلیمنٹ غا بجٹ اجلاس غو دوجو مرحلو پہلک تیں شروع ہو رہیو ہے۔
- *4. سیال غی کھیڈاں ”کھیلو انڈیا“ غا دوجا مرحلہ غو اج شام باقاعدہ افتتاح کیو جا رہیو ہے۔
- *5. محکمہ موسمیات نے جموں کشمیر مانہ پہلک تیں بارشاں غی پیشنگوئی کی ہے۔

خبران غی تفصیل نال پہلاں باغ علی طاہر۔

PM WCD

وزیر اعظم نریندر مو دی نے خواتین تے بچہ بہبود بارے وزارت غی وزیر مملکت سوتری ٹھاکر غی طرفوں مصنو عی ذبانت غو خواتین غی باختیاری غا کردار ور لکھیا گیا اک مضمون نانہ سنیر کیو۔ اک سماجی میڈیا پوسٹ ور جناب مو دی غو کہنو تھو جے مصنو عی ذبانت نہ چھڑی خواتین واسطے فائدہ مند ہے، بلکہ نواں موقعاً پیدا کرن مانہ وی مددگار ثابت ویگی۔ اک بور سماجی میڈیا پوسٹ مانہ محترمہ ٹھاکر غو کہنو تھو جے سال 2047 توڑی ترقی یافتہ بھارت غا عزم سنگ وزیر اعظم ملک نانہ اک مضبوط تے خود کفیل قوم بنان غی خاطر کم کر رہیا ایں۔ جس مانہ خواتین غی بروبر شرکت بڑی اہم ہے۔ ان غو مزید کہنو تھو جے مصنو عی ذبانت نہ چھڑی خواتین واسطے نواں موقع پیدا کرے گی، بلکہ ان نانہ سماج مانہ اک فیصلہ کن کردار نبھان غے قابل بناوے گی۔

Security Meeting

مرکزی داخلہ سیکریٹری گووند موہن نے یوٹی غی سلامتی صورتحال غو جائزو لین غی خاطر جموں مانہ اک اعلیٰ سطحی میٹنگ غی صدارت کی۔ دو نشستیں مانہ ہون آلی اس میٹنگ مانہ پولیس، سلامتی دستاں تے خفیہ ایجنسیاں غا سینئر عہدیداراں نے شرکت کی۔ میٹنگ غے دوران جموں کشمیر غی سلامتی صورتحال غو جائزو لین تیں علاوہ دہشت گردی غا خاتمہ غی خاطر لایاء عمل طے کیو گیو۔ اپنو عہد سنبھالن غے بعد مرکزی سیکریٹری داخلہ غو جموں ڈویژن غی سلامتی صورتحال غو یوہ پہلو جائزو ہے۔ اس توں پہلاں وے سلامتی صورتحال غو جائزو لین غی خاطر وادی کشمیر غو دورو کر چکا ایں۔ میٹنگ تیں پہلاں بی ایس ایف غا ڈائریکٹر جنرل دلجیت سنگھ چودھری نے کل جموں پُج غے ضلع پونچھ مانہ کنٹرول لائن غو دورو لایو۔ جت

اُنہاں نانہہ سینئر عہدیداراں نے بی ایس ایف غی طرفوں کی جان آلی کا روائیاں غی جانکاری دتی۔

Kathua Missing Civilians

ضلع کٹھوعہ غا ملہار علاقہ تین اک نوجوان تے اُس غا 2 رشتے داراں غی لاش برآمد کی گئی ہیں۔ واضح رہے کہ یہ تھے افراد 3 روز پہلاں شادی غی اک تقریب غے دوران لا پتہ ہو گیا تھا۔ مہارہ نمائندہ نے جانکاری دیتاں واں دسیو ہے کہ یہ لاش ملہار علاقہ غا ایشو نالہ تین فوج تے پولیس غی اک سانجی تلاشی کا روائی غے دوران برآمد کی گئی۔ پولیس غو کہنو ہے کہ اس معاملہ غی تحقیقات کی جا رہی ہے۔ اُدھم پور پا رلیمانی حلقہ تین ممبر پا رلیمینٹ تے مرکزی وزیر ڈاکٹر جتندر سنگھ نے اس بارے گل کرتاں واں کہیو ہے کہ یہ معاملہ ہے حد تشویش ناک ہے۔ اپنی اک سماجی میڈیا پوسٹ مانہہ وزیر موصوف نے کہیو ہے کہ یہ معاملہ اس پر امن علاقہ غا ماحول نانہہ خراب کرن غی اک گہری سازش ہے۔ نائب وزیر اعلیٰ سریندر چو دھری نے وی اس معاملہ غی مزمت کی ہے۔ اسے دوران کانگریس نے اس معاملہ غی اعلیٰ سطحی جانچ غو مطالبو کیو ہے، تانجے لوکاں غا دلاں تین خوف ختم کر غے علاقہ مانہہ تحفظ غو ماحول قائم کیو جا سکے۔

NDRF

ضلع پونچھ غا کلانی علاقہ تین 25 فروری نانہہ اک درد ناک حادثہ تین بعد لا پتہ 2 افراد غی تلاش واسطے قدرتی آفات نال نمژن بارے قومی دستہ (این ڈی آر ایف) غی ٹیمان نانہہ تعینات کیو گیو ہے۔ 13 بٹالین (این ڈی آر ایف) غا ڈپٹی کمانڈنٹ اُتم سنگھ غی سربراہی مانہہ تلاشی کا روائی نانہہ مزید تیز کر دتو گیو ہے۔ دسیو گیو ہے کہ دو لا پتہ افراد غو گڈی غا حادثہ تین بعد کوئی پتو نہیں چلیو ہے۔ این ڈی آر ایف ٹیم تلاش واسطے خصوصی آلات نال کا روائی غا نا ہموار علاقان مانہہ تلاش کا روائی عمل مانہہ لیا رہی ہے، تانجے لا پتہ افراد نانہہ تلاش کیو جا سکے۔

Martyr's Families felicitated

شیر کشمیر پولیس اکیڈمی آڈیٹوریم اُدھم پور مانہہ شہید پولیس افسراں گا افراد کنباں غی شہید کیپٹن توشار مہاجن میموریل ٹرسٹ غی طرفوں اج عزت افزائی کی گئی۔ اس موقع ور وطن نال محبت غا جذبہ نال متی تعداد مانہہ لوکاں نے شرکت کی۔ یاہ تقریب شہید کیپٹن توشار مہاجن (شو ریا چکر) غاناواں شہیدی تہاڑا غا موقع ور منعقد ہونی۔ یاد رہے کہ کیپٹن توشار مہاجن سال 2016 مانہہ جنوبی کشمیر غا پانیو ر سیکٹر مانہہ دہشت گرداں نال لڑتاں واں شہید ہو گیا تھا۔ اس تقریب مانہہ ڈائریکٹر شیر کشمیر پولیس اکیڈمی اُدھم پور ر غریب داس، اُدھم پور ریا سی رینج غا ڈی آئی جی رئیس احمد بھٹ، ایس ایس پی اُدھم پور ر اموڈ اشوک ناگیو رے سمیت دوجا سینئر پولیس افسراں، شہریاں تے طالب علماں نے شرکت کی۔ ات بولتاں واں شہید کیپٹن غا والد دیوراج گپتا نے کہیو۔۔۔ بانٹ۔۔۔

مزید خبراں نال عبدالمجید۔ ور اُس تیں پہلاں یوہ پیغام۔(یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن آنیر ڈاٹ گوو ڈاٹ ان ور وی دستیاب ہیں، اس تیں یہ (خبر مہاری مو بائل ایپ تے ڈی ٹی ایچ ور وی دستیاب ہیں

Budget Session

پارلیمنٹ غا بجٹ اجلاس گو دوجو حصو پہلک تیں شروع ہو رہیو ہے۔ بجٹ اجلاس غا اس حصہ مانہ 20 نشست ویں گی۔ تے یوہ آئندہ اپریل مہینہ غی 4 تاریخ توڑی جاری رہ گو۔ اجلاس غے دوران سال 26/2025 واسطے گرانٹس غا مطالبات اور متعلقہ تخصیص بل ور بحث تے ووٹینگ وے گی۔ اس غے علاوہ بینک ضابطہ ترمیمی بل، کو سٹل شپنگ بل 2024، تری بھون ساہکاری یونیورسٹی بل، امیگریشن اینڈ فارنرز بل 2025 تے ریلوے ترمیمی بل سمیت کئی قانون سازی نانہ بحث تے منظوری واسطے لیو جائے گو پارلیمنٹ غا بجٹ اجلاس غو پہلو حصو 31 جنوری تیں 13 فروری تک منعقد ہو و تھو۔

Winter Games

کھیلو انڈیا سرمائی کھیڈ 2025 غو اچ دوجو مرحلو گلمرگ مانہ شروع ہوو۔ پہلے تہاڑے اچ الپائن اسکیٹنگ، نورڈیک اسکیٹنگ، سکنی کوہ پیمائی تے سنو بورڈنگ مانہ بکھ بکھ مقابلان غو انعقاد کیو جا رہیو ہے۔ کھیڈان غا یہ مقابلہ اچ تیں اس مہینہ غی 12 تاریخ تک جاری رہیں گا۔ مذکورہ کھیڈان غو پہلو مرحلو لداخ غا ضلع لہیہ مانہ اس بہرے جنوری مانہ منعقد ہوو تھو۔ جس مانہ آئیس اسکیٹنگ تے آئیس ہاکی غا مقابلہ منعقد کیا گیا تھا۔ ان کھیڈان غو باقاعدہ آغاز شام ساڈھ 6 بجے کیو جائے گو۔ تے اس 3 روزہ تقریب مانہ 8 سو کھلاڑی شرکت کر رہیا ہیں۔ لیفٹنٹ گورنر منوج سنہا اس افتتاحی تقریب مانہ شرکت کریں گا۔

CSIR-IIIM

سی ایس آئی آر، آئی ایم جموں غی طرفوں سال 2025 غی پُہلاں غی سالانہ نمائش تے کسانان غو اجتماع اچ انسٹیٹیوٹ غا بڑا کیمپس مانہ کامیابی سنگ منعقد کرایو۔ اس موقع ور پُہلانی غا کسانان تے ماہرین نے اپنا تجربہ سانجہ کیا، تانجے پائیدار ذرعی سرگرمیاں نانہ بابدو دتو جاسکے۔ سال 1961 تیں شروع ہون آلی اس سالانہ تقریب سنگ کسانان مانہ پُہلانی، باغبانی تے ماحولیاتی پائیداری بارے خاصی بیداری پیدا ہوئی ہے۔ اس موقع ور بولتان واں ڈائریکٹر سی ایس آئی آر، آئی ایم جموں ڈاکٹر زبیر احمد نے پُہلانی غو معیشت نانہ مضبوط بنان تے دیہی آمدنی مانہ بہتری لیان بارے کردار ور لوہ پائی۔ انہاں نے ادارہ غی طرفوں تحقیق تے ترقی مانہ کیا جان آلا کم بارے وی جانکاری دتی۔ اُن غو کہنو تھو جے اس ادارہ غی طرفوں اروما مشن تے جامنی انقلاب جیسا پروگراماں غے ذریعے پائیدار کاشتکاری تے کسانان غی مدد کی ہے۔

Awareness Programme Kishtwar

کالسریاں غا بین القوامی تہاڑہ غا موقع ور جموں کشمیر پولیس نے ضلع کشتواڑ مانہ اک بیداری پروگرام غو انعقاد سرکاری ہائر سکینڈری اسکول شاترو مانہ کیو۔ اس پروگرام غے دوران بچیاں تے عملہ نانہ حالیہ لاگو کیا گیا قوانین بارے جانکاری دتی گئی۔ اس دوران ایس ایچ او پولیس تھانہ شاترو انسپکٹر وکرم سنگھ نے بھارتیہ نیانے سنہیتا، بھارتیہ نا گرک سرکشن سنہیتا تے بھارتیہ سکشیا ادھنیم 2023 بارے دسیو۔ خواتین غا تحفظ وغیرہ ور زور دتو گیو۔

JKPDCL Summer Meet

جموں پاور ڈولپمنٹ کا رپو ریشن لمیٹڈ غا منیجنگ ڈائریکٹر یاسین چودھری نے اک میٹنگ مانہ آئندہ گرمیاں غا موسم غے دوران بلا خلل بجلی غی فراہمی نانہ یقینی بنان واسطے پہلاں ہی اقدام کرن غی ضرورت ور زور پایو۔ اُدھم پور، ریا سی، کٹھوہ، سانبہ تے جموں غا رسوینگ اسٹیشن غی ضروری توسیع بارے میٹنگ مانہ تبادلہ خیال ہوئے تے فیصلو لیو گیو۔ تانجے بجلی غا بنیا دی ڈھانچہ مانہ افزائش تے اضافو کیو جا سکے۔ منیجنگ ڈائریکٹر نے افسران نانہ ہدایت دتیں جے وے کسے وی مسئلہ غا حل واسطے ہر وقت موجود رہیں۔ جے کے پی ڈی سی ایل، بجلی غا بنیادی ڈھانچہ نانہ بہتر کرن تے بجلی بچان بارے بیداری عام کرن وغیرہ وروی زور دے رہی ہے۔

Weather

محکمہ موسمیات نے سوموار تیں جموں کشمیر مانہ گرج چمک غے نال ہلکی بارش تے برفباری غی پیشنگوئی کی ہے۔ آکاشواںی جموں غا نامہ نگار نے خبر دتی ہے جے محکمہ موسمیات نے دسیو ہے جے ہلکی بارش تے برفباری غو یوہ سلسلو آئندہ 4 تہاڑاں توڑی جاری رہے گو۔ جد کہ آئندہ 24 گھنٹاں غے دوران عام طور ور موسم خشک رہے گو پہلک تیں 14 مارچ توڑی کشمیر خطہ مانہ بارش تے برفباری اور صوبہ جموں مانہ کتے کتے بارش ہون غی پیشنگوئی کی گئی ہے۔ اس دوران صوبہ کشمیر مانہ رات غو کہٹ وکہٹ درجہ حرارت عام درجہ حرارت تیں 1 تیں 2 ڈگری سلیسس کہٹ تھو ج کہ صوبہ جموں مانہ عام طور ور معمول تیں 3 ڈگری سلیسس کہٹ تھو۔
